



BAP. GVARINI
I V N I O R.

*IN FVNERE ALOYSII ESTEN.
PRINCIPIS ILLVSTRISS.*

ET S. R. E. CARD. AMPLISS.


O R A T I O.



FERRARIÆ,

Excudebat Victorius Baldinus.

Typographus Ducalis. 1587.





BAP. GVARINI IVN.

O R A T I O

IN FVNERE ALOYSII ESTENS.

Principis Illustriss. & S.R.E. Card. Ampliss.



BIT, Alfonſe Dux Sereniſſime, obijt inquam
ALOYSIVS ille Princeps & Cardinalis Eſten-
 ſis poſt hominum memoriam maximus & am-
 pliſſimus, frater tuus. In cuius funere celebrā-
 do non ſatis cumulatè viſum eſt tibi partes piē-
 tiſſimi fratris, & Principis expleuiſſe, niſi mu-
 nus hoc quod ſupremum cum eo tibi futurū
 erat, laudatione publica decoraffes: ne ſurdo potius cineri iuſta
 ſolvere, quam quod iuſtum eſt præclariffimo eius nomini red-
 dere videreris: néue hoc celeberrimum amoris tui testimoniū
 anguſtis vnus templi finibus circumſcriptum poſt inferias eua-
 neſcat; ſed ita viuat, & in ore omnium vigeat, vt vbi tanti viri
 gloria prædicatur, ibi & tua pietas innotefcat. Mihi verò ne-
 ſcio quo meo fato tantum id oneris ſuſtinenti, ſi laudes quæ-
 rere lachrymis datum eſſet, ſi dolore facundiam comparare;
 quam mihi hodierna die prouinciam, licet arduam & meis
 imparem viribus commiſiſti, eam certè ſperarem non minus
 facilè quàm luculenter abſolvere. quis eſt enim qui cū in-
 tueatur in hoc humanæ conditionis luſtuoliſſimum ſimula-
 chrum, ſecumq; animo reputet, tot ac tantas virtutes ita ſecum
 acerbam immatramq; mortem hauſiſſe, vt ſuperſeſſe vix tanti
 Principis videatur veſtigium illud ſepulcro & cineri deſtinatū

quis inquam est qui mœrendo, ac deplorando hoc quod reliquũ est pietatis officium præstandum esse non censeat? Sed quoniã clarissimorum hominum vita non breui hoc naturæ, sed æterno gloriæ spiritu continetur, neminem certè tam consternatæ mentis existimo, qui licèt iacturam ipsam tam insignem ac lachrymabilem iniquo animo ferat, indignum tamen atque abhorrens à vera pietate non censeat funus hoc Principis inuictissimi muliebri luctu, & fletibus funestare. cùm sola nobis tantarum laudum cõmemoratio, tanquam reuiuiscantis illius Aloysij, quem nos extinctum credimus, veram & si non oculis intue dam, saltem animo venerandam exhibere possit imaginẽ. Tantisper igitur lachrymis temperandum, donec ostendero nihil ei lachrymabile contigisse. tandiu cohibendus est dolor, dum nullam doloris causam nisi fortè nobiscum esse docuero. Tuq; in primis Srenissime Princeps quanquam fraternæ pietatis & iusti doloris sensum ab animo tuo remouere nec audeo, nec debeo, nec si vellem fortasse possim; tu tamen vt Princeps inuicti, & heroici animi in funere tanti Principis verè tibi natura, & virtute germani, ita te composito vultu, & vt soles animo præsta, vt hæc verè squallida, & omni eloquentiæ lumine destituta oratio mea, tua summa benignitate illustrata, erecta que hoc quod instat arduum, ac præstantissimum munus absoluat. Est hoc in more positum, & ab omnibus ferè grauissimis oratoribus vsurpatum, vt facta excellentissimorum hominum laudaturi, ab ipsis natalibus auspicentur. natura enim comparatum est, vt ferè semper ab optimis optimi procreentur, & vt ipsa generis virtus à parentibus instillata, veluti occultum quoddam nobilitatis semen in liberos transmittatur. Quo licèt præclarissimo instituto vereor ne hodie in maximi huius Principis laudibus tanquam superua caneo, vtinam non inepto abuti videar. quis enim est rerum omnium tam ignarus, tam expers qui clarissimam tum Estensis, tum Valesiæ domus nobilitatem ignoret? quæ gens, quæ natio in toto terrarum orbe tam barbara, tam remota, ad quam vtriusque gloria non persuaferit? quis nescit Estensium Principum sobolem: in qua non aduentitiam, aut externam, sed ingentam, ac germanam Italici sanguinis claritatem adhuc vigere non dubitamus, non solùm in eadem prouincia, vnde prius originem duxit, & tam altè radices egit, sed etiam in Germania; nobilitate minimè accepta, sed communicata, tot infestissimis seculis

culis, tot barbarorum colluuiionibus virtute non minus quàm tempore superatis, tot non solum imperijs, sed ipso quoque Imperij diademate decoratam, tot victorijs insignitam, tot Regum atque Imperatorum affinitatibus auctam, non vi sed legibus, non scelere sed virtute, non fortuna sed meritis ad nostra vsque tempora propagatam? Ab hac igitur tam insigni, ac tam vetusta generis excellentia Hercule scilicet ac Renata Ludouici Galliarum maximi, & potentissimi Regis, Annaeque citerioris Britanniae Ducissae filia, parentibus Serenissimis ortus est Aloysius Princeps. qui omne ab ipsis heroicum, omne regium ita hausit, ita haustum retinuit, ita retentum virtute propria decorauit, vt eius meritis penè ipsa nobilitata nobilitas videretur. In hoc verò licet amplissimo laudis genere diutius immorari non decet; ne si praecipuas in eo partes orationis meae consumerem, id potius quod non fuit Aloysij proprium, quàm Aloysium ipsum laudauisse videri possim. Non secus ac si quis auream fortè statuam probaturus; licet aurum metallorum omnium praestantissimū sit, illam tamen ab auro potius commendaret quàm ab egregio artificis magisterio, vel ab ea quae optimè foret expressa vel Dei, vel hominis forma; procul dubio videretur non statuam ipsam, sed potius aurum in statua commendasse. At verò in tanta rerum quae mihi se se offerunt vbertate, in tanta excellentissimarum virtutum copia quid primum mihi futurum sit, quid postremū affirmare certè non ausim. hæsitat. n. lingua in commemoratione tantarum laudum, hæsitat animus. vt iure quidem optimo videatur nullam nos in hoc Principe nec maiorem, nec veriorē asserere posse laudem, quàm quod laudari minimè possit. Quemadmodum in praestantissimis illis formis vsu venire solet, in quibus tam delicata oris lineamenta natuta indidit, vt superent omnem artem, & ipsam quantumuis doctam pictoris manum effugere, vel vt verius dicam eludere videantur. Sed posteaquam in hoc tanto, ac tam immenso dicendi spatio perducenda, vel potius periclitanda est oratio nostra; dabimus operam, vt quemadmodum solent ij qui vastissima coelestium orbium corpora in angusta sphaera concludunt, vt vnico coelum videri possit obtutu: ita nos in breuissimum orationis gyrum tantarum laudum materiam contrahentes, heroicam summi Principis & Cardinalis naturam exhibeamus vnico mentis intuitu contemplandam, Quid enim absurdius dici, aut excogitari potest; quid minus

minus consentaneum rationi, quàm eminentissimorum hominum laudes exquirere à minusculis, & vulgaribus illis virtutibus, quæ cum singulis communicari possunt, & solent, quibusque priuati etiam homines gloriantur? Paruos parua decent, maxima maximos, nec breui lentre vastissimus tantarum laudum Oceanus est tentandus. Ego enim sic censeo, vnamquæque hominum conditionem propriam sibi, & congruentem fortitam esse virtutem, cuius excellentia cæteræ omnes, etiam si mediocres extiterint, illustrantur. Vt enim corpora ipsa quæ generantur, & occidunt; quanquam ex omnibus ijs naturis, quæ rerum sunt primordia, continentur; sibi tamen asciscunt, ac propè vendicant dominantem quandam ex innatis illis seminibus facultatem, cuius propensione ad ea quæ sibi cognata sunt mouentur, ac propemodum concitantur; ita in ipsis virtutibus euenire videmus, quæ licèt omnes humanæ sint, omnes ad vitam hominis informandam maximè necessaria; sic tamen suam propriam atque peculiarem vnaquæque vitæ conditio sibi vendicat, vt qui ea præditus est, pro vniuscuiusque vel fortuna, vel ordine, vel natura, quod sibi consentaneum est & libentiùs, & decentiùs agere videatur. quid enim tam proprium est probi ciuis quàm patriæ charitas? quid liberi hominis quàm veritas? quid serui quàm obsequium? agricolæ tolerantia, mercatoris fides, militis fortitudo, adolescentis modestia, scæminæ pudicitia, senatoris integritas, iudicis innocentia? Principis verò magnanimitas, splendor, & gloriæ desiderium. quæ cùm diuini, & veri numinis gratia tanquam bonorum omnium culmine aucta fuerit, vt est in Principe sacerdotali purpura insignito, quid mirum si quæ naturam ipsam excedunt, oratoris quoque superant vires? Vos igitur auditores, quodcunque summum est in omni virtute, quod in omni perfectæ actionis, & vitæ genere heroicum, & sublime, vnico verbo comprehendite, & veram Aloysij laudē breuiter explicabitis. Iuuat ne eius vitā ab ipsis vsque incunabulis indagare? nulla fuit in illo ætas tam infirma, quæ pubescentis illius animi futurā nō ostenderet magnitudinē; quodcunque enim aut loqueretur aut ageret præseferbat nescio quos ingentis, & inuidiæ naturæ spiritus, vt illæ ipsæ medius fidius pueriles etiam lusiones indicare nihil abiectum, nihil humile viderentur. Postea verò quàm adoleuit, naturæ leges ita confudit, crescendi que terminos anteuerit, vt ætas ingenio, corpus animo vinceretur. quam quidem præclaram

claram Principis indolem, probè nouit, & admiratus est acerrimus ille hominum æstimator Paulus Quartus Pontifex Maximus, qui cùm diuino admonente spiritu præsensisset quanta in Christiana religione futura esset accessio, si tantum, ac tantę expectationis adolescentem ad sacerdotium assumpsisset cathedralem nobilissimæ huius Urbis Ecclesiam illi tradidit moderandã. Dici non potest quàm citò magni præfulis, non personam modò suscepit, sed dignitatem, & munera sustinuerit. vt enim nouella planta surculo reuirescens, ita omnem illius pristinam, ingentemq; naturam in peregrinum germen transmittit, vt alienos fructus veluti proprios edere videatur; non aliter adhuc recens ille animus postquàm recepit insitum religionis amorem, sic omnem cogitationem in eius curam traduxit, vt cum ipsa penè natura Principis ingenerata ecclesiastica illa dignitas videretur. Sed quoniam nihil, vt diximus, quod non esset arduum, & excellens affectare non poterat, eò redacta res est, vt eius ingentes spiritus non caperet vnus Ecclesiæ meditatio. Conceperat iam animo illo suo immeso vniuersam christianæ Reipublicæ molem: in omnes eius partes mentem versabat: regna, & prouincias, quæ à catholica fide descuerant reuocare; quæ nōdum agnouerant instituire: pietatis, & religionis fines extendere: tot hæresum detestabilem, ac renascentem hydram extinguere: christianos mores formare: catholicam fidem ubiq; gentium afferre: in vnico tandem ouili, & sub vno tantum pastore christianū populum conuocare. Hæc erant Aloysij præcipuæ sollicitudines, hæc eius vota, hæc diurna, nocturnaq; desideria. Sed quoniã virtutem illam ad hæc omnia peragenda non satis profuturam existimabat, quæ non fuisset multarum, & maximarum rerum experientia comprobata; illicò exarsit incredibili peregrinationis desiderio, vt sic multorum hominum mores, populorum leges, ecclesiarum instituta cognosceret: primòque in Galliam aduolat, vt ab ea Mundi parte, à qua generis ducebat exordium, ordiretur; simulque Henricum maximum illum Regem, sororemque, & alios Regij sanguinis tum cognatos, tum amicos inuiseret. Vt verò in aula illa verè regia tot summorum procerum, atque Principum amplitudine magnus ille animus, & heroicus nullam splendoris partē amiserit, sed inter magnos maior euaserit; vtque suauissimis eius moribus omnium cuiuscunque ordinis hominum, & præcipuè Regis ipsius gratiam comparaue-
rit,

rit, testis est ipsa Gallia, testes sunt ipsi Principes, ipsi Reges, testes denique sunt amplissimi, tot prouentus, ecclesiasticaque dignitates, quibus ab ipsis Regibus mirificè auctus fuit, atque coonestatus: inter quas Auxitanam, & re, & nomine magnam, & prestantem illam ecclesiam, relicta iam pridem Ferrariensi, vsque ad exitum vitæ retinuit. At verò ipsum vltèrius transiturum paternam mors reuocauit; cùmq; sub idem ferè tempus defuncto Paulo Quarto, Pius itidem Quartus summus Pontifex electus fuisset, mirum est dictu, quàm subito in eundem Aloysium, quem tantopere Paulus amauerat, oculos verterit, & ne minori iudicio in eius virtute dignoscenda fuisse videretur, ab eius Cardinalatu Pontificatum ipse suum voluit auspicari. Hic verè cogor facundæ vires omnes expetere, omnes sitire fontes eloquij. queritis fortasse Auditores quid Aloysius egerit Cardinalis? at ego vicissim quæram à vobis quid non egerit. consulite Romam toties admiratam, quid Romam? consulite Italiam sæpius gloriantem, quid Italiam? consulite vniuersum terrarum orbem, vno omnium animorum, & sermonum concentu illius gloriam prædicantem. Cardinalatus honorem honore proprio decorauit: catholicam fidem inuicta fide protexit, rem ecclesiasticam mira pietate defendit, apostolicæ sedis dignitatem, existimatione, consilio, sapientia inuit, auxit, fulsit, amplificauit: prouincijs in fide titubantibus salutarem manum porrexit: in futuris Pontificibus eligendis cœleste tulit suffragium: quicquid egit, quicquid potuit ad sanctæ sedis auctoritatem, & commodum transtulit: christianorum Principum pacem omni studio, amicitiam incredibili munificentia coluit: nationes omnes singulari humanitate pellexit: domum, quid domum? imò verò tres splendidissimas domos ad vniuersi orbis hospitium non aperuit modo sed prodidit; in quibus omnia ita cum peregrinis erant communia, vt ipsi iam non iure hospitalitatis, sed domicilij, non tanquam hospites diuerterent, sed tanquam domini possiderent. Verè quidem magna sunt ista, sed multò maxima si quæ sequuntur adiecta fuerint. Caroli Noni, & Henrici Secundi potentissimorum Gallie Regum rationes, & negotia omnia procurauit: cum sanctissimo in terris Christi vicario Christianissimum Regem officijs, & studijs omnibus conciliauit: vt sui Regis dignitatem per omnia tueretur non sumptibus, non periculis, non ipsi vitæ pepercit: Gallos omnes in Italiam descendentes hospicio

tio suscepit, auctoritate fouit, opibus iuuat : ciuili, ac diutino bello regnum illud distractum, ne discerptum potius dicam, auxilia vndecunque parauit, pericula auertit, existimationem retinuit. Quid plura? prouinciam illam omnem humeris ipsis mediis fidiis, vt Atlas cœlum sustinuit. O Gallia Gallia, quem parentem, quem defensorum, quod propugnaulum amisisti. O Christianissime Rex Henrice quam fidem, quod obsequium perdidisti. Tu idem ille qui es in potentissimo regno tuo eodem ferè spiritu, eademq; amplitudine viuente hoc Principe fuisti etiam Romæ. ita enim magnificè; ita splendide quæcunque ad te pertinerent administrabat verè ille regius administer, vt regiam maiestatem non solum opere, & re, sed ore, sed eloquio, sed præsentia tueretur. At quantus qualisue fuerit Aloysius Cardinalis hætenus ipsa vita præclarum tribuit testimonium. audite nunc loquentem etiam eius mortem, & hoc idem cumulatius referentem. Senatus ille purpuratorum maximus, & amplissimus, insignis ille tot summorum Principum, tot præstantissimorum procerum, sapientissimorumq; hominum ex omni Republica christiana selectus ordo, sanctissimi illi diuinarum, humanarumque rerum omnium verè cardines, nonne videntur vnus Cardinalis Estensis interitu consternati, afflictique, & omni solatio penitus destituti? Quid maius est ipsa Roma? quid præclarius? quæ Ciuitas in æstimandis hominibus perspicatior? in admirandis cautior? & tamen qui eius faciem aspexisset, omnisque vel ætatis, vel sexus, vel ordinis voces, & lachrymas exaudisset, omnem eius salutis, ac vitæ spem in hoc vno Principe concidisse, & in eodem Cardinalis Estensis funere efferi funus Romani populi credidisset. Hæc tantæ charitatis, pietatisque iura etiam apud exteros sibi vendicat splendida illa, & vera Principum virtus, magnificentia; quæ cum ad omnes passim emanet, ac diffundatur, & ipsi quoque passim ab omnibus venerantur, & vbiq; patriam, honores, & gloriam consequuntur. quæ quidem virtus in hoc Principe tanta fuit, quanta vix cogitatione ipsa comprehendere, nedum oratione consequi valeam. quis enim locus est in orbe terrarum cognito tam longinquus in quo non extet vestigium aliquod illius splendoris, atque magnificentiae, non illud quidem ad exigui temporis recordationem leuiter indicatum, sed altissime ad memoriam hominum sempiternam infixum? Quæ enim apud ipsum, vel in sumptibus infumendis, vel in largitionibus fa-

ciendis, vel in beneficijs collocandis, quæ dico res fuit apud ipsum vel tam præcipua quam non sperneret, vel tam magna quàm non paruipenderet? ita enim semper in his omnibus peragendis, seu demandandis insuperabilem, vt ita dicam, se præstitit, vt cum omnium non modò expectationem, sed ipsam accipientis quoque spem superaret, nunquam tamen se ipsum, & suam animi magnitudinem videri poterat æquaturus: potuisset enim potius euenire, vt alienam habendi, quàm suam erogandi cupiditatem expleisset. foelicissimus si omnia simul habuisset, vt omnia donaturus illicò non haberet. Confluentium verò ad ipsum, tanquam ad gratiarum fontem vberimum cuiuscunque generis hominum non voces aucupabatur, sed indigentiam obseruabat, vltroq; ipsis tam opportunè non verbo, sed re munificus occurrebat, vt penè ipsa eorum vota, ne dum preces opere præueniret. rogatus verò ita se totum ad alterius nutum composuit, vt multò plus rogatori, quàm rogato similis videretur; dixissesque illum non polliceri, sed accipere potius beneficium. Quod verò admirabilius est ita facilis fuit ad hauriendas, imprimendasq; animo illo suo beneficētissimo deprecantiū affectiones, vt aliorum non modò placidè, sed libenter etiam onera sustineret, & quem pro se ipso nunquam egestatis habuit sensum, pro alijs experiri, ac perpeti non detrectaret. quid plura? concludamus vnico verbo. nephas erat apud ipsum, & quasi quoddam piaculum negare quod posset, quod verò non posset infœlicitas, atque dolor. At quid non potuit? quænam res illi tam ardua, ne dicam impossibilis vnquam fuit, quam non aggredieretur animosa illa, & plena Estensis spiritus magnanimitas? quid ope illius heroicæ charitatis non obtinebat? quis tam rigidus gratiarum omnium inimicus, qui coràm alloquentis, ac deprecantis illius vim sustineret? Vigebat in eius ore maiestas cum singulari quadam comitate coniuncta, quæ dum simul amorem, & reuerentiam excitaret, animos non alliceret modò, sed quòd ipse vellet nolentes etiam ipsos impelleret. tametsi quis negare ausus fuisset quicquam ei, qui nihil omnino nouerat denegare? Cum hac igitur tanta magni Principis, & Antistitis charitate quis dubitabit non omnes alias coniunctas esse virtutes? quæritis exploratam æternæ vitæ fiduciam? eius exitum contemplantini. vir ille magnanimus, & gloriæ cupidissimus immatura morte præuentus, mortem quæ finis est totius humanæ gloriæ, totius heroicæ actionis, non per-

horre-

horrebat, quia vitam in æterna patria præstantiorem sperabat. Vultis inuictam sperandarum rerum constantiam? vos appello domesticos eius omnes, appello vos intimos illius animi exploratores, quis ex vobis est, qui de affectata potius à vestro Domino vita, quàm morte audeat affirmare? non ne omnes iam pridem illius cogitationes, opera omnia tam apertè humanarum rerum fastidium ostendebant, ut personare in omnibus Apostolica illa vox videretur, Cupio dissolui, & esse cum Christo? Vultis denique insuperabilem animi fortitudinem? non aliunde quàm ab ipsa morte, hoc est supremum formidabilium omnium, exempla petite. qualis enim intrepidi illius viri status erat in morte? ille idem qui semper fuit in vita. in cruciatibus corporis idem vultus, in laboribus mortis idem animus. flebat ne ille? lamentabatur? quærebat à circumstantibus opem? absit. labefactata iam, atque victa succumbebat ipsa natura, omnia iam instantissima mors occupabat, vigeat in eo tamen insuperabilis illa excelsi animi virtus, quæ nulla mortis caligine obscurari, nullis coerceri vinculis poterat: & dum omnes alij lachrymabantur, lamentabantur, inuictus ille semper, & si vnquam aliàs, sui similis de duobus regnis verè regius vir satagebat; cœlesti scilicet quem affectabat, & quò sacratissimis Ecclesiæ sanctæ præsidij ab ipso meritis requisitis, religiosèque habitis, properabat: humano, dum Gallici regni curas in Oratoris regij sinu deponeret, extremasq; fidei, & amoris erga suum Regem reliquias ministro regio commendaret. O virum in vita magnum, in morte maximū. ò Principem regio sanguine verè genitum. ò generosam Estensis domus propaginem, cui te comparabo? Domesticos habuisti tu quidem vitæ, & morum formatores, nempe duos Hippolytos maiorem scilicet, & minorem patruos tuos, præclarissima illa duo Ecclésiæ sydera, duo illa virtutum omnium exemplaria, quæ dum imitanda proposuisti, longissimè superasses si naturæ tibi, non valetudinis cursum peragere contigisset. quòd si corpore fuisses tu, ut eras animo validus; profectò non satis tibi erant futuræ nec Roma, nec Italia, nec Gallia, nec Panonia, nec ferè ipse terrarum orbis ad ea quæ maximus ille tuus moliebatur animus excipienda. O mortem nimis importunam, semper acerbam. Ego iam, ut verè fatear, non mediocriter sentio, nimis arduas à me hodie leges, ipsa etiam teste, vel potius repugnante natura, fuisse nobis impositas. Sentio quàm difficile sit in tam commu-

ni luctu, in tantis tenebris, & squalore, in tam lugubri rerum omnium facie non languescere, non commoueri. Video quale oculis nostris spectaculum, qualem animis luctum funus hoc acerbissimum excitauerit. Omnia quæ amissimus subeunt Principem nobilitate clarissimum, virtute eminentissimum, splendore nominis celeberrimum; eo nobis ætatis suæ robore ereptum, quo iam maturi fructus ingenij vberiores percipi potuissent. O iacturam incomparabilem, infinitam, ab hominum memoria nullo æuo delendam, nullo sæculo reparandam. Si naturæ sequimur sensum, quis est hodie tam seuerus, ne dicam inhumanus, qui non dolere constantiam, qui non flere virtutem, censeat appellandam? sed si lachrymis locus esset quis potissimum deplorandus? Aloysius Princeps, qui cum mortales sensus exuerit æternos est consecutus? absit. deplorandi potius nosmetipsi, qui quo præsidio frueremur, postquam priuamur, agnoscimus. Deplorandi vos domestici eius omnes, qui non dominum, sed patrum, sed custodem, sed propugnatorem, sed parentem optimū amissistis. At non est vera piers in aliena felicitate ingemiscere, iacturam propriam in amici gloria deplorare. Beneficium accepistis esto propterea ne dolendum? imò verò lætandum, quod pro tantis illius meritis quam vos concipere animo vix potuistis mercedem, cumulatissimè nunc retribuatur bonorum ille omnium remunerator æternus. Præsidium amissistis, fateor, at conijcite ipse vestras omnes in hoc quod superest solidissimum, ac tutissimum Estensis familiæ columnen Principem scilicet nostrum non minus re, quàm nomine Serenissimum. in hoc vnico recreamini; per hunc emergite è fluctibus lachrymarum; in hoc denique respirate; in hoc reuiuiscite. quid enim hoc superstitie metuendum? quid hoc sospite non sperandum? Erigite animos vestros, erigite, nec in his mortalibus Aloysij monumentis insistite: sed quibus ille vestigijs commigrauit in æternum beatitudinis domicilium, persequimini eum vos. illic enim videbitis magnā, ac beatam illam animam exultantem, & vestras, ni fallor inanes lachrymas iridentem. Præcipuè verò te Serenissime Princeps consolari vox illa debet amantissimi fratris tui, quam è cælo, ubi nunc beatissimus ille viuere exaudire mihi videtur. Ego, inquit, Sereniss me frater si longius producere vitæ limites mihi datum fuisset, quid aliud in vobis habuisssem, quàm vt pro tua salute, atque incolumitate, sobolis incremento, imperij amplitudine, for-

tunarum accessione, rerū denique, & bonorū omnium affluētia, perpetuaq; felicitate Deum Optimū Maximum deprecarer? Nunc verò quādo illud mihi non humanis precibus sed diuinis, non cordi sed spiritu, non lingua sed intuitu, non spe, vel fide, sed purissima in Deum charitate multò meliūs datum est, ac perfectiūs implorare, cur doles? tua causa? ne, qui morte mea, imò potius vita pro mortali cœleste, pro caduco sempiternum consecutus es patrociniū? mea? ne, qui cum quiete labores, cum securitate molestiam, cum vita mortem commutauī? Reprime igitur frater optime, reprimate vos sorores amantissimæ lachrymas. & si fortè vos, quæ vestra est pietas, vehemens adhuc mei desyderium detinet, quærite vosmetipsos, atque intima pectoris indagatē. illic poteritis me vestris animis insidentem, fraternamq; charitatem fraterno spiritu instillantem quandocunque libuerit inuenire. Audiamus igitur Serenissime Princeps, audiamus ipsum è cœlo sic alloquentem, sanctissimèq; consolantem. Cauene dixeris Aloyšium fratrem tuum adhuc non viuere, qui vitæ cursum habuit breuem, gloriæ sempiternum. Dixi.

Habita Ferrariæ in Sacra Principis æde XIII. Kl. Feb.
M. D. LXXXVII.



AD BAPTISTAM
GVARINVM IVN.
SERMI DV C I S F E R R.
INTIMVM CONSILIARIVM,

E Q V I T E M P E R I L L V S T R E M,
Oratorem, & Poetam celeberrimum.

HIERONYMVS BOVIVS FERR.
Sacrae Theologiae Doct.



P R I N C I P I S E S T E N S I S decuit si funus acerbū
Plangere, cui texit purpura sacra comas:
Dicere si ductos ortus à sanguine Regum:
Dicere quæ Heroem splendida facta decent.
Flectere si demum poterat quis pectora flendo
Iacturam tanti Principis; vnus eras.
Vnus eras G V A R I N E potens sermonis, & artis.

Hæc fuerant humeris pondera digua tuis.
Vastum nanque tua Oceanum sacundia vincit,
Dum tu Cecropios fundis ab ore modos.
Mitto quòd es Vatum splendor, Phæbique sacerdos,
Parnassi custos, Mæonidumque decus.
Fert animus lachrymis lachrymas coniungere, luctus
Luctibus, & gemitus consociare tuos.
Sed quia non possum Aonios attingere fontes,
Tu mihi plestra dabis: tu mihi Phæbus eris.
Magnanimi E S T E N S I S mestus dum funera ploras,
Quem non compellas plangere, nullus erit.
Luctifonos si quis poterit non fundere fletus.
Suspicio Hircanas hunc genuisse feras.
Dum G V A R I N E gemis, vidi iuuenesque, senesque
Imbre rigare sinus, vngue notare genas.
Scindere conspexi vestes, abrumpere verba
Singultu, manibus dilaniare comas.
Lugubri induitur dum plangis Olympus amictu,
Et prope at gemitus mittere cum lachrymis.

Roma gemit tecum : deflet Ferraria tecum ;
 Et Rhodanus plorat , plorat & Eridanus .
Cui Princeps protector erat flet Gallia Tybur
 Tam chari lachrymans corporis ossa tegit .
Funera dum luges , fleuerunt omnia tecum
 Cælum , homines , vrbes , flumina , templa , fera .
Magna loquar . te flente truces vlulasse leones ,
 Barbaricosque Geras indoluisse ferunt .
Quid mirum ? ex culti eloquij dum fulmina vibras ,
 Marmora verborum poneere fracta ruunt .
Compta Pericleo loqueris dum verba lepore ,
 Mollia sunt dictis marmora facta tuis .
Mouisti lachrymas . potuisti augere dolores :
 Sistere tu luctus : sistere tu gemitus .
Sic nigras socians noctis venit Hesperus umbras ,
 Qui redit Eois Lucifer albus aquis .
Nanque ubi (quod memoras) Cælo est A L O T S I V S alto ,
 Qui teneat summi regna beata poli ;
Detergunt lachrymas omnes ; sua lumina siccant ,
 Principis & placida funera mente ferunt .
Iure semel miseri morituri viuimus omnes .
 Continuo celeri mors venit atra pede .
Mors venit ? ab fallor : mors euolat ocyor Euro .
 Mors omnes , nulli parcere docta , rapit .
Vt properans fluuius menses labuntur , & anni .
 Vita velut fumus transit , vt umbra fugit .
Nascimur , & morimur . spes Clotho sedula rumpit .
 Vertitur in cineres quod fuit antè cinis .
Prætereunt tituli omnes , mitra , sceptræ , coronæ .
 Gloria virtutum non moritura manet .
E S T E N S I S nomen toto celebrabitur orbe ,
 Vixerit & chartis tempus in omne tuis .
Quà perflant venti , stant montes , flumina currunt .
 Quà Soles ardent , frigora quà ne rigent .
Auricomæ E S T E N S I S decorabit sidere Cælum ,
 Vt splendor vincens Urbis , & Orbis erat .
At G V A R I N E tibi , quem Maurus nouit , & Indus
 E S T E N S E M æternum sit gemuisse decus :
 Dumque tuo eloquio illustras hæc funera , demptus
 Sit mundo mæror , sit tibi partus honor .

T V M V L I
IN OBIT V I L L V S.^{MI} ET
REVER.^{MI} ALOYSII ESTENSIS
S. R. E. CARDINALIS
A M P L I S S I M I.

AVTHORE HIERONYMO BOVIO FERRAR.
A D V I A T O R E M.

<p>HOC iacet in tumulo Estensis. si cetera quaras . Cetera Guarinus, cetera Fama docet. I I . Quò properas? supplex cineres venerare sa- cratos . Est dignus tanto Principe tantus honor . I I I . Hic iacet Estensis . sed cetera novit Iberus . Euphrates, Rhodanus, Nil⁹, & Antipodes . I I I I . Quò pergis? sistas . iacet hic Aloysius ille Magnanim⁹ Princeps . hac satis hospes abi.</p>	<p style="text-align: right;">V .</p> <p>Siste gradum . hoc avidus cupias spectare sepulchrum . Et debere oculis tunc fateare tuis . Hac ille aurata situs est Aloysius urna . Par meritis cuius gloria nulla fuit . V I . Nubila miraris? tumidos miraris et Austros? Curie imbres Cælo, nocte, dieq; cadant? Desine mirari . Sunt nubes mæror Olympi . Sunt vèti gemitus . sunt pluvia lachrymæ . Nanque E S T purpurei priuatus lumina Solis . Qui mundi splendor, qui decus Urbis erat.</p>
---	---

T V M V L V S
Ferraria, & Gallia colloquuntur .

<p>F. LVctificæ tibi nunc demonstrat vulnera mortis, Funera G V A R I N V S dum mea collachrymat .</p>	G.
<p>F. Commaculant mea si plorando pectora luctus (Principe mox raptò) tu tua dilaceres .</p>	G.
<p>F. Diripuit mihi si Clotho nunc viscera acerbo Funere , clam Lachesis cor tibi surripuit .</p>	G.
<p>F. Empyreomanet vt Princeps nunc æthere nosler, Pellere nos curas vult sine tristitia .</p>	G.
<p>F. Præstiterat bona si mundo tunc plurima viuens, Millia nunc Cælo sic tibi contulerit .</p>	G.

